

甲子重印

史久龍著

憶吉臺雜記

吳郁生題

中華民國十三年十一月重印

有 不 著 准 作 翻 權 印

著 者 姚 江 史 久 龍

印 刷 者 教 養 局 印 刷 科

發 行 者 教 養 局

全 一 冊 價 銀 三 角

97952362

68932

5020

復旦大學圖書館

RW7685/10

憶臺雜記自敘

僕以先大夫宦游產於關中自甲申迄乙未始則隨侍維揚繼則歸去武林復由武林而游赤嵌蓋此一紀中僕僕道路間之苦猶其次也而流離播遷之狀殆有難以筆墨罄者第以成童弱冠之年而自東自西海濼山陬足跡所至不下萬里亦可云謂壯矣古人於遨遊所及之地類有劄記非盡欲以昭茲來許所以紀一己之見聞而驗其學識也維揚武林名勝之區人所共知無待僕爲之記且僕彼時年幼亦不識所爲記赤嵌僻居海外初時人皆視爲畏途近來風氣漸開乃遽爲他人所奪僕雖幸獲免於荼毒安歸故里而憶其風土人情文章政事時覺怦然有動於中爰置一冊於案偶有憶及昔日之耳聞目見以及身所親歷並此次割台議成外侮內訌官奔民走種種倉皇離亂情形凡僕之所曾經所曾知均拉雜筆之舉一漏萬勢所不免而文人學士閱之又必譏爲失晨之雞也然而僕實不敏奚敢辭焉聊書數言以爲引


光緒龍飛二十有二年太歲在柔兆涸灘三月日躔大梁之次姚江藕中人蓮蓀史久



憶臺雜記

龍自識於味果寄舫

上卷



憶臺雜記

壬辰仲秋余重定游臺之計以仁伯久丹翰臣久青二兄相招甚切也遂部署行裝於廿九日攜眷起程九月初二三更至滬以候輪小住五日至初七登赴廈門輪當夜啓旋初九至汕頭廣東潮州所屬也其地煥熱特甚時滬上已需薄棉衣着單衣猶揮汗不止予以小有疾未登岸但遙瞻甲第連綿垣墉高聳蓋亦一大都會也輪舟停泊之處時有攜橙來售者食之甘鮮沁脾申江此時則尙未有又有攜木處所燒之磁佛像以及各種玩具售者均潔白如玉亦間有豆綠色及雜色者殊覺可愛輪舟於初十日復行十一日晡時至廈舍舟登岸棲止旅館又以候舟故久羈矣此間言語啾啾茫茫莫解無可與談者悶則閒步山巔瞻眺海景波浪若山舟舶如梭洵足以擴眼界但時見路側建小祠如杭州之土地堂然中則纍纍然人骨也觸目狼籍陰森可怖且似時有人焚香屋檐懸紅布扁額大書誠感字樣夫掩骼埋胔仁者之行苟此人骨爲有子嗣者則自當安其窀穸無使暴露如爲無裔者則既有人焚香懸額亦宜共發惻隱爲

之瘞諸原隴庶幾亡者得以魂安九泉何計不出此而徒爲之焚香懸額如謂焚香懸額者力微不逮則所處之祠何自而來此誠不可解矣豈此處之風俗使然耶祇以言語不通未能學入國入境之間至今猶莫釋疑團十八日有爹利士輪赴臺南附之去十九日申刻抵安平此處爲臺灣南路之海口波浪素稱險惡然亦有時自四月至八月逢天晴則波浪尙平天雨則洶湧殊甚午前尙殺午後猶屬此數月渡者咸有戒心自九月至三月則其勢稍減然每值風雨亦汨汨滔天洪濤激逐之聲徹於城廂渡者逢此時不敢以舟多以竹筏上置木桶令人坐其中而以棉衾覆之始可不虞傾覆浪湲緣內外港交接之處有沙綿互海底名之爲鐵板沙湧浪之大以沙水相激使然耳故此處輪船不能進內港值風濤大作之時輒赴澎湖避之莫敢稍停焉鐵板沙即鯤身也此亦天設之險耳余是日登岸時已黃昏波平浪靜毫無顛簸及至岸已將二鼓不及入城時仁兄遣僕來迎卽借宿於僕之友家是夜悉翰兄噩耗次早赴其柩次哭拜而後入城與仁兄同寓旅舍相與敘手足情媿媿不倦是爲抵臺南之第一日回憶

由滬登輪歷江浙閩三省洋面經汕頭抵廈門達臺南碧海風景誠屬大觀四顧茫茫頓增豪興竊念苟非饑來驅我何至磨驢蹤跡又及赤嵌而得賦曾經滄海難爲水之句耶昔人云詩以窮愁工予則見以窮愁廣詎非樂景乎得卽事並哭翰兄詩三章附錄之

八月江海平趣裝自瀾水置身碧浪間人憂我獨喜蠕蠕天地中形影相寄爾何時非

危懼何事非福履放眼滄海闊舉頭祥雲紫

由滬至廈海中曾見紫雲

詎非一大觀胡爲嘆不救

日逢展重陽赤嵌境孔邇老伴駕舟來相迓登涯浹始見無他詞但詢人泰否伴對語
模稜閃爍復詭譎惟言大兄來不及二兄趾彼時玉漏深不克踰城雉午夜頻輾轉狐
疑百端起翌晨伴愴言二兄長已矣乍聞驚霹靂瞠目難啓齒繼淚落如綫撫棺痛不
已仰首問蒼天胡爲乎若此年來陳人繼薦食似蛇豕豈盡運磨蝸廈木聯蹤圯豈乏
不龜手藥籠不足恃急趁見大兄謁罷問此理大兄長嘆曰命也惟任只余乃恍然悟
莫究此端委握手道殷勤相慰毋過毀方令共馳驅壘僥命相倚何必徒痛悼楚囚狀

可據即云初願遠三厲莫並比伯仲中仁翰二兄及龍為長而在臺者亦惟仁翰二兄 夙櫻死丁憂求集

翁美

右即事五古一章

荆枝並茂本同根碧海迢遙繫夢魂每藉遺書啟鴈序時思縮地共

鶴原派分流合心剛愾氣肅寒嚴物剪繁最是傷懷開篋處新秋手畢跡空存兄係八月初五日逝世七月二十一日猶致贈書 遺道相招憫我孤團團手足共榮枯為吟杖杜求同姓鄭謙孫同姓同祖也

敢畏書瀛異坦途犯斗憲猶靈苑處修文賀已玉京趨早知鷓鴣臨凡室悔待秋深到

海隅

右哭翰兄近體二章

臺灣古稱毗舍那國而人民輻輳財物豐盈則臺南甲於全臺故紅夷先據延平後奪

皆以臺南為都會今之府署即昔延平王宮道署皆不及其大也自劉省三爵宮保奏

設省治而繁庶又當以臺北為巨擘矣予旅寓小憩謁支應局提調包哲臣太尊客相

見之餘頗蒙青眼約僕移住局內襄理文案是局設於府署右側鴻指園本府署之花

園也廳事宏廠房廊清潔廳前有假山數峯中植鐵樹四五本花開白色晝綻夜閉饒

有別韻此花須數十年一開予適見之亦可云眼福矣後廳院西有大榕樹一合抱須

四五人老幹虬蟠濃葉稠密院大畝許陰翳過之云係延平手植諒非誣也冬夜得感懷詩一章附錄之

玄默執徐首夏初渤海解組朝丹除池蓮雖戒勿剪伐蟬聯開綻花稀疏食無魚兮待客薄壯懷勃勃圖遠略欲行未行猶躊躇鴈行隔海傳書約仲秋趣裝不少停赤嵌直視若門庭斯時有友戒途險余曰巾幗限戶牖同人祖道珍錯備勸盡一杯情真摯共言此去御羊角登程何與登仙異余方執爵慚不遑諸君何事誇張背城借一知勝負敢云遷地卽爲良英雄初皆無大志不才况非干將器犇波鯤溟爲饕餮差幸克敦手足誼九秋鼓輪驅指東滄海芻厖轟洪波碧日紅掩映遠龍奔蛟走顧盼雄行行履古叱舍國竊喜墟旄免相憶聞聲仲氏早反真駭愕風雲太難測此時伯氏亦速遽重爾鶴駛大羅天衆口鑠金能消骨惹以明珠卸仔肩同人謂我御羊角胡爲易仍占蹇剝饑來驅我謀筆耕孰知卞和空抱璞龍圖太守幸多情溫厚笑不比河清闕室下構人賓幕感恩知己寸心傾吁嗟事誠逆覩鸛海市蜃樓不耐看破釜沉舟渡圖異選

遍半異夙肺肝何期孝肅最禮士木屑竹頭亦異視襪線短才藉鳩藏磨驢蹤跡步履
馳况復廣廈萬間深奇食勿擬同淮陰比室繆彤

山陰繆獻甫茂才繪畫時包公延主西席甲午己登賢書爲包

公之賢東林劉禹錫

劉錫錫時受學於獻甫先生

說經問字尤快心無何熊軾旋珂里將謀

窻窈安考妣生既得儲藥籠小住爲佳還轅俟丈夫氣象欲巍巍顛連何必泣牛衣

阮籍途窮狂阮籍途非故與籍相違世人胡乃不俟命可知原憲貧非病難食肉非毛

雖相喜絕交豈孔方姓嘗聞物不固閉藏一發無餘味鷄長蚩蚩何獨味物理雄飛雌

伏費評章又聞天將使建樹玉成陶鑄經營苦茫茫誰克識天心顛沛流離畏如虎不

見寶劍埋豐城狴犴幾沒千載英雷煥拂拭華陰土風雲際會躍延平不見良驥鹽車

困躪闕太行神疲頓卒逢伯樂一顧知仰天長鳴俯地噴自顧堪稱不世珍焦桐權且

代松蘿中郎豈必難重遇端恐懷才或未真筆談怪我似鋸屑勿效豐干慣饒舌芸芸

未必皆憤憤起看明月光瑩潔

台南府城距安平鎮八里城周圍約六里東西長南北狹城內繁縟之處以竹仔街西

門爲最城外則以西門外之南勢北勢街爲最闌闐林立陳設璀璨亦不亞於武林之清和坊維揚之轅門橋惟所嫌者房屋卑小街道窄狹攘來熙往真有擊肩摩轂之狀南勢北勢街之間以有各洋行故房屋亦有巍然特出者然均係漳泉款式如滬上小東門外洋行街者然雖云宏大其局面究嫌狹小耳

府治設鎮署一道署一府署一縣署一按司獄府經歷教授訓導縣教諭典史各一又設行臺一始以備福建巡撫巡臺暫駐幃帷繼則惟供歲科試之用

鎮憲兼統鎮海各營強半駐劄安平兼旗后等處距城三四里建營壘二其勢犬牙交錯頗稱雄壯濱海建砲臺二內外交顧戰守皆宜此次日人起衅前守者固棄之如遺獲守者亦未獲一用有備與無備等惜哉

巡道兼按察使銜每歲秋審皆須赴北錄囚未設巡撫前尙兼學政嗣以巡撫兼學政巡撫如憚跋涉則臺中臺南二府歲科試奏委巡道代考故儀衛亦較內地爲優蓋亦以內情覺悍俾知漢官威儀之尊嚴藉使警服然亦究視政刑何如也

城內設支應局一總司南路收支錢糧兵餉鹽務總局一司南路之鹽務兼鹽務與江浙異其說另具於後軍裝局一電報局一釐局則設於安平焉縣署側有海神廟一卽天后宮也中有百尺危樓巍然高聳登其上碧海風景均歸一覽至望海樓則在道未獲登臨然是樓已可與相埒矣

小南門內有火藥廠一貯火藥之所也廠左右均屬曠野四五人合抱之榕樹約十數株修幹參天密陰匝地甚有其根皆見於地上嵯岬蟠踞一株之根占地畝許者亦一大觀也

安平設海關一距安平八十里之旗后復設海關一旗后卽打狗口也臺南海關釐金所權者均以糖爲大宗而海關糖以外尙有洋藥數亦頗鉅輪船出入以十月至次年五月爲多蓋以新糖上市須發兌也出糖之地以鳳山爲最次則安平嘉義每歲以數千萬斤計惟其色均係紅黃故滬上不售強半連往東洋彼再加以製煉變爲純白復運至中國以弋利可云善經營矣至華地則甯波亦善製故連寧者亦多他處過問者

甚少也

余以九月至臺其時只著單衣尙揮汗不止據久於臺者云四時天氣無甚差別大暑則稍加熱大寒則稍加涼耳乃壬辰冬冷冽非常仲冬杪幾有雨雪之勢余則御皮衣者三日僉云是創見也癸巳甲午余均在北其寒與江浙同惟未見雪耳士著均云所未曾經者也豈此地將屬他人而天於數年前卽示變耶

壬辰仲冬杪北風怒號海波掀天安平口外洪濤激射如萬馬奔騰其聲轟轟徹夜不魚支應局距海口約在十里以外聞之至不能安枕澎湖距安平二百四十里風利時辰發午可至也嘉平朔日晨有自彼處來者言前數日風發時有巨魚適爲風吹至沙灘上其長約五丈餘困頓海濱不能轉側遂爲鄉人爭鬻其肉以煎油其肉多至百餘挑魚哉魚哉其爲白龍魚服歟其爲擘重貫盈歟

臺灣地處海中故秋冬之際四處所發颶風均當其衝十人呼之曰風颶洋人於此等事考究最精每值風發先一時香港必有電音告以風發自何方何時每刻行着千里

須經何方抵何方何時始息於是海關卽懸旗告警而舟子皆知趨避焉

臺疆人民均係由漳泉二州遷來者故言語與漳泉大同小異口齒齟齬實難辨解初到者如無舌人傳言則彼此皆屬捍格余始抵臺時深患苦之數月始稍解焉然居之數年僅能聽聞至效其言亦不過十分之三也如人曰郎男曰達波女曰遮嫺飯曰餵肉曰馬我曰娃事曰獸幾有曰烏茶曰德菸曰葷吃曰夾之類警牙屈舌令人茫茫至不必曰免無曰沒之類尙屬可解但彼於文則人亦曰人男亦曰男余嘗問彼等土音能呼出者能寫出否應曰不能余亦不過順其音而書之耳如云彼所呼者卽係此字則未必也

癸巳正初以事赴嘉義縣屬臺南距府一百里旱道乘肩輿行二日按臺灣一里爲內地二里故百里而須二日始到也沿途所過鎮市以茅港尾下加冬爲大然亦不過百餘家耳餘則十數家數家者均爲小集其房屋則皆卑小鄙陋不堪惟竹園及合抱之樹在在皆是頗覺可觀蓋臺疆地居赤道故竹樹皆不甚凋謝也田間已有從事稼

稽者地氣之熱可證已出茅港尾過曾文溪溪水尙小渡以竹筏面寬里許臺灣每至夏秋山水暴發均由各溪而歸於海當水大時渡溪者恆兢兢業業焉溪之最大而最險者北路之大甲防里是也最長而最險者南中路之濁水寶斗是也其小者殆不可以數計途中賣食物者以山薯粥爲多別無所售而別物亦不可食臺人多以山薯代飯云多食可以益氣健胃與內地相反且患病多戒食米而不戒食山薯余初抵時偶爲造化小兒所苦衆皆勸余食山薯初猶狐疑不敢後試食之疾果漸愈此豈地氣使然耶嗣閱本草從新謂其補脾胃驅溼熱養血長肌肉海濱人多壽皆食此物之故薯譜亦極贊其功閩人以白密煮食治下痢又治婦人赤白帶是足見其利溼熱之功甚鉅也是臺人使病者食之固非杜撰而無所本耳

嘉邑夙稱繁富自清丈田畝後國賦日增民生日敝說者謂臺民之田多係開墾荒野而得者其始也既非價買其繼也復不升科現雖丈量無遺於彼似無大損不知當丈之時從事者豈盡仁人私壑既盈則豪富可免賂遺未至則飛灑無窮事後亦間有一

二更正者然非有大力者莫克挽回此臺灣通省之大敵政不獨嘉義一縣爲然也當事者盡昧藏富於民之義惜哉此余擬有請爲奏減之議也

嘉義本名諸羅林爽文之難嘉民共舉義師竭力守禦不從逆黨總兵柴大紀奏聞純廟嘉之錫以今名

嘉城東南四十里有火焰山火向洞外炎洞口有樹一小株日經灼炙而毫不形焦他物經之則立成灰燼屢欲往觀皆以事不果聞海外有火浣布或卽此樹所織歟然今碧眼買之所市亦無火浣布之名誠不敢以臆斷也

城內通市尙稱繁庶惟其房屋規模較臺南又不如矣亦止縣前一帶尙有可觀其餘則自卹以下無譏焉

城內駐一參將所統之兵除本標外有福建提標一營聞係平林爽聞難之時留以駐守者而此輩傳子傳孫儼成世襲而且狐羣狗黨無惡不作較之本標城守尤有甚焉民人皆畏之如虎其所札之教場俗卽以提標街呼之行經其地稍有不慎卽受其侮

嗟乎天下之綠旗兵大都如是耳國家年糜費鉅萬金以畜養之非但無益而且有害夫何謂哉此予擬有裁守兵之議也今果有是舉矣誠可上爲國變下爲民賀者也城中賭風甚盛又麻雀打寶等戲皆上等之人爲之次則本地之四色牌打銅寶爲上下通行之具四色牌者按象棋之式分裂紅黃綠白四色此種屬可大可小之戲最爲害者莫如銅寶其式亦以骨子分勝負惟其外以銅碗盛之故名銅寶設銅寶攤之處以提標街及縣前爲盛每日自戌亥始至寅卯止此六時中起家者有之傾家者有之小亦至失業無聊而本地之紳耆商賈無不趨之若鶩卽官場中亦間有與焉者尤可怪者官睹之而若不見官聞之而若不知其或以水滸無大魚察政不得下和歟抑宗昔人之相戒無動市塵歟夫市塵爲納垢藏污之區緩治之則可安急治之則走險固也然果有大害於我民者亦當毅然決然芟之除之惡可養虺蛇而培稂莠耶誠所不可解也然而江河成於涓涓燎原延以星星其所由來者漸矣且不僅嘉邑爲然也三月還郡天熱與內地五月同禾黍已芻芻然如黃雲矣可知地氣之早也四月杪送

仁兄眷由安平口登輪赴北是日天氣清明初無甚風乃駁船出口而波浪洶湧異常幾至不能穩坐但見浪來則駁船與輪舟艙面平浪去則駁船與輪舟艙底齊忽上忽下人多欲嘔予俟其登輪亟返安平險矣哉

五月南郡大雨連朝城垣官署圯坍者不可勝數晴後霉氣薰蒸較江浙尤甚數倍而天時忽冷忽熱善捫生者皆易致疾余時以繆劉二君返鄉赴試遂自側院遷入正室與包公對戶而居院中大榕樹適當牕下每至日午濃蔭周匝遍室陰森毫無熱氣中心暢適之極孰知居未匝月即患寒疾迨愈後而兩足如木彊矣行動維艱痛癢不知直至抵北後醫治兩月餘始行痊可其間之苦楚實難忍受不至成癱瘓者幾希痛定思痛方悟今日之患乃昔日之快所致也微乎危乎慎之思之天下事均如是耳

七月予附送鄉試士子輪繞福州赴臺北十六夜由南啓旋十七午至福行近長門口外之水綠口內之水黃截然畫一雖以并州刀斷之亦不能如此毫無混淆近口行六十里至馬江自長門至馬江港路曲環山峯夾峙雄關天險莫與比倫真有一夫當關

萬夫莫開之勢而甲申法人之役張佩綸一敗塗地更可奇者不在長門而在馬江不守虎口俗名五虎口而守虎尾萬古罪人之名將何所逃夫張佩綸者使之久處於諫垣烏臺爲殿上虎俾內外臣工人人知所畏懼在國則可以清政治在彼則可以保令名計之善也闢外之權烏足當哉非爲書生不足以言兵事蓋言夸色厲之人必不足以當大任何則言夸心必狂色厲氣必虛心狂氣虛之人操筆墨以議論世事則有餘執權衡以籌畫國政則不足此其人卽使之爲太平封疆猶有任尙之禍而况使之爲亂流砥柱詎無殷浩之敗哉不然則諸葛一生爲謹慎之謂何而孔子曰君子不以言舉人之謂何耶

馬關設有船廠係左文襄公所奏建者規模宏敞局勢整齊夙所嚮慕予因力疾登岸彳亍前往藉以仰瞻船政衙門深重不能入觀但見其崔巍宏大而已至其船塢若者爲鉄廠若者爲木廠錚錚之聲不絕於耳適造一船尙未告竣觀其上指揮一切者係洋人也吁我中國學西法者數十年矣而事事仍須借用楚材一日有事則以他人所

製之器還擊他人是何異於逢蒙學射於羿而欲射羿耶現在各處之製造機器等局何獨不然耶是非愚之愚者乎

馬關街市頗爲宏廣而氣象亦甚富庶本擬往南臺省垣一觀因恐輪舟須開且予之痠病甚厲不良於行是以不果計馬關距南臺水程六十里早晚有小火輪二次開往甚屬便捷南臺距省旱道十里須乘肩輿此次適以疾阻不能前往游觀誠爲憾事

十八日由閩開行適天日晴和月色尤佳亦無甚風日間尙覺顛簸入夜則舟平如水矣同舟者惟劉同民別駕度馮蘭笙獻尹大鏞餘無人同民別駕乃南豐循吏劉蓮舫先生之曾孫也好金石善詩字其行篋所藏漢魏碑帖甚富予均獲展玩焉在南郡無三日不見晤則必暢談至午夜而散本隸吳中仕版以挂誤而來臺投效者也是夜共步月艙面清話終宵迨進滬尾口時東望日出滄海雖不及泰山大觀然其光華滉耀之勢亦可謂見所未見矣所乘之輪爲台灣商務局官輪名曰斯美是輪專行上海者尙有駕時專行香港一帶其中鋪陳局面甚覺堂皇迥與別舟不同此二舟乃昔年

醕邸閱北洋海軍時初云擬至南洋劉省帥派員洪姓赴德國定裝以備迎迓者也每舟價洋十八萬元而運費亦幾如之洪以此獲罪入淡水縣監者數年

十九日晨停輪滬尾是處爲臺北之要口岸有炮台防守泊定後換小舟倩小輪拖帶行三十里至大稻埕登岸大稻埕乃臺北城外之鬧市也時仁兄假寓試院遂乘人力車入城前赴焉

臺灣當奏設省城時擬以台中府彰化縣以之葫蘆墩爲省治故於葫蘆墩特設縣曰台灣縣以其地居中權也台北府初爲淡水廳嗣升爲府另設縣仍名淡水劉省帥當開闢草創時卽駐節臺北一以臺灣縣屬新設衙署一切布置尙須時日一以剿撫生番軍械糧餉在北便於調度然葫蘆墩雖屬中權而地面荒涼人烟寥落設縣尙可設省非宜自應巡撫扼臺北巡道扼臺南以成常山蛇首尾之勢愚初至台時卽謂臺灣固屬南洋門戶然由北至南縱不過五百里橫則西屬大海東爲番界無事時一巡道率重兵守之已有餘有事時乃四面受敵之地孤懸海外必須閩廣江浙四路合救方保

無虞偷敵人南北夾攻而我無應援雖百巡撫亦必不守唐徵卿帥固爲無膽無識之流劉淵亭軍門何以亦終於一遁哉可知其計之左矣且日人未必不因設巡撫後金煤茶腦糖各利大旺而始起覬覦之念也予有句曰地闢寶呈天示警言金沙開市旺也商茂敵垂涎不可謂非確論也至甲午春經邵小村中丞及濂奏請卽以台北爲省方奉 俞允而戰事已起於高句驪逾歲遂以我之民人土地輕畀鄰敵然不奪而予殊非逆料所及悲夫

巡撫兼督海關兼管學政海關在北則滬尾基隆在南則安平旗后旗后卽打狗口也每年約共徵二百餘萬金然北以滬尾爲大南以安平爲大基隆旗后不過附庸但每年奏結徵數摺子只云打狗總口其餘不登以部中惟知一打狗口也至文風則甚爲陋劣予初在南時欲購一書而遍覓市中絕無書坊方以爲台南係郡城台北當不至如是乃至北周行開市亦復如是其入於讀書一道毫不講究可知矣巡撫每逢歲科試北郡多係自考南中二郡多委巡道代考聞諸個中人云其文竟有不可閱者北郡

以新竹爲最中郡以彰化爲最南郡以安平嘉義爲最然其上乘終須推粵籍中人粵籍者係廣人住台日久而准其一體應試者春秋闈榜臺灣之獲登多係粵籍是可證已

欽差幫辦撫墾事宜太常寺卿林維源號時甫本漳州人至其祖始遷於臺家住淡水縣鄉板橋良田數千畝藏鏹數百萬行商除台灣外廈門香港無不有之而台北茶利腦利又多係彼享其富不但甲台灣恐亦甲念一行省矣至考其田則皆屬自行開墾而獲者其銀則不知何自而來其官則係報效軍餉而得者所不足者無子耳其曾經欽賜舉人之子螟蛉也且聞彼亦係其父效蠟贏而負之者其或以財旺而丁弱歟其衙署建於大稻埕外中式而內洋式雕牆峻宇頗壯觀瞻迨亦漢卜式之流亞歟

臺北城內惟北門街以近於撫署故最繁庶次則布司前其府前府後等街不過人烟尙稠密耳至文廟試院淡水縣等處直如魯靈光之巍然獨存也街衢仿諸滬瀆然寬廣如之平坦則初修竣時行東洋車尙屬快意日久經雨水冲淋崎嶇凸凹在在皆現

而無人過問車行其上逾時有傾跌之虞始勤終怠此我中國之事事貽誤西人也
 西門內建有西學堂番學堂其屋皆仿洋式西學堂者擬延西人教西學之禮也番學
 堂者係聚熟番之子弟而讀書之處也皆爲劉省三宮保所創辦以西學經費太鉅俾
 止番學則延請名師教育番童供其衣食厚其獎勵並定學額一名以鼓舞之數年之
 間頗費心力聞其中已有可造之才乃其父兄固欲其回社而不欲其受學遂至事從
 中輟若使教學既成未必不可由漸而入徧化梗頑不意當時官長遽聽其父兄之請
 惜哉且聞諸爲番學堂師者云中有數番童回社後起居飲食諸多不便屢欲仍赴學
 堂而均爲其父兄所阻此尤可惜之甚也西學番學既廢其屋皆空若腦務總局若腦
 務總局若牙釐總局均設其中焉至善後局則在藩署之側軍械所則在小南門內其
 規模甚爲宏敞也

城中西北二門爲通衢東南二門距番界不遠寥落亦甚爾北長東西狹周圍約八九
 里臨北門即大稻埕出西門折而南爲鱈牌是三處爲商賈屯聚之所富庶甲城內十

倍而大稻埕尤首屈一指以其地勢濱河輪船通於滬尾火車達於基隆各洋行均翊集焉

西北二門外途路仿上海棋盤街式中寶石子外夾石條東洋車行之毫無偏頗道傍夾植柳樹風日清和時躑躅游行頗有歇浦風景此路初係官辦乃一經雨雪而地皆深陷大有行不得也哥哥之嘆經辦委員因此獲譴嗣經林時甫欽差包辦始成坦道然不能不有損壞之時因以修理之責使東洋車行任之而不收其車捐以此永克如砥如矢林以土著而爲欽差幫辦商而兼官者也故尙無官樣文章氣習此可知我中國舉辦一切官辦不如商辦之精商辦不如民辦之久曼曼若若者可以亟思其故哉北門外設機器局一局勢規模均仿諸上海以道員督辦之工匠約有千人每日辰進西出然設立多年並未製造一物日不過修理洋鎗焙製火藥而已所能者爲各衙署中或製一閨閣用物或修一玩飾小器各公寓內與局中人有相識者亦可倩其代作國家糜以鉅款上下視爲重地而身居其中者惟藉此獻奇技於大府飽私囊於一已

誠可笑而可痛者也他處斯局想亦不過如是耳更有甚者割地議定膺斯局之任者自當將其利器或運或毀免資敵用卽不然亦當棄之已耳乃和議一出卽將其中銅鋼等件紛紛求售售之不足又將工匠薪水用餘款項侵吞十餘萬雖事後褫革其職烏足蔽其辜哉此無怪乎我中國之國庫日虛外侮日迫也噫吁嘻夫復何言

商務總局本設於機器局內嗣移至東門外車路傍之洋房此處原係局房初因以辦機器局者兼辦故合而爲一後復舊制故仍分之東達基隆六十里南達新竹一百里赴基隆者行三十里至八堵換車日行二次赴新竹者過大橋行五十里至中壢換車亦日行二次辰開午返未開酉返以大稻埕爲提綱大橋卽在大稻埕以堅木鋼鐵造之長約七八十丈寬四五丈施水欄分三道中設鐵軌行車左右行人橋頭可隨時啓閉不礙帆檣來往靡費四十萬金始成沿途所過鐵橋不一皆不若此處之大故名曰大橋基隆一路至獅子嶺須過一山洞入其中黑暗如漆行約五分鐘時昔兵丁因開鑿此洞而死於其間不可勝數新竹一路行歸崙嶺稍覺艱難土性均不甚堅凝而

颶風淫雨又復時作故坍塌中斷之事時有所聞也

台北茶市每至二三月間頗爲熱鬧各茶行內檢茶婦女晨聚夕散不可數計每年出口約數百萬箱茶釐局設於大稻埕河濱年征七八十萬元本係官辦嗣因百弊叢生遂爲林時甫之旅人包辦其茶行於廈門香港等處多爲洋人所購內地則不行也以其葉質既粗而又生於深山其性復寒且色香味俱不見佳洋人視之爲藥故尙樂飲至我中國之熟讀陸羽茶經者固不願服卽玉川子之奴亦必望望然而去之也

金砂產於基隆聽民自採官爲約束入山挖取人須領牌每牌日收錢二百五十文本係設局委員專辦嗣改歸基隆廳兼辦初不甚旺採取者不過所入敷所出而已甲午春陡然大盛甚有一日而採至數百兩者於是官民羣起耽耽而視時署廳篆者卽包太尊知利既大興害必叢生因請另立總分局以稽查彈壓之遂設總局於瑞芳店設分局於九份八堵等處惟九份出金甚旺他處不及也甚有昨尙赤貧如洗今忽作富家翁者一時官爲之紛然民爲之皇然盜爲之閔然糾結繳繞而不獲已當時大憲復

延礦師察礦苗之興衰擬購機器歸官採取礦師云下有成塊如磚者嗣以戰事起遂中止爾時甚宜相錯之區無山不穴無穴不深而巨腹買之收買者亦踵趾相接甚至每兩金砂價至三十餘元蓋收去後一經洗鍊卽成精金攜至滬上可大獲利然因之傾家者亦復不少且聞日人現在依舊開挖而絕無僅有緊何故哉嘗閱臺灣志書云金砂旺臺地亂蓋其盛也正亡之兆耳

煤礦亦在基隆每年供本地之用供來往輪船之用尙須供上海招商局之用每年所出亦復不少惟歸商辦而不歸官辦故其弊尙少也

十月予奉藩憲札委辦滬尾鹽務子館臺灣以新設省治候補人員不敷遣用故投効人員一律差委冬月朔接鈐到差按臺疆鹽務收售均歸官而不歸商而南北二郡有攸別中郡則由南從同省城設總局綜核全臺此下有總館子館販館總子館均係委員而子館轄於總館販館乃總子各館地界相距太遠之處恐隣館有沖銷情事擇土著之可靠者每年就其地認銷若干石彼有微利可需亦樂於從事全臺總館八臺北

曰艋舺曰基隆曰宜蘭曰竹塹臺中曰大甲曰鹿港臺南曰安嘉曰鳳山安嘉郡城分設之總局所兼也所轄之子販等館或七八或五六各不等臺北所收之鹽多係春夏間海舟由泉州載來者名曰唐鹽臺人以內地爲唐山故名鹽曰唐在泉收買每担約二三百文至臺後由官給洋一元收鹽兩石其秤名曰一三五蓋以一百三十五斤爲一石復加消耗三斤共爲一三八此三斤爲委員之利餘則盡屬公鹽然往往各館配運到館每石少則長二十斤多則至三十斤此則在善盡人事否也滬基各設一配運局卽專司唐鹽到而配發各館也偶有唐鹽短缺之時則派輪舟運臺南場鹽名曰府鹽蓋昔止臺南一府猶沿舊名也此鹽到北各館皆須賠累雖仍用一三五秤而不知既黑且溼銷售鈍滯存倉日久每石少至十餘斤尙屬幸事台南則自行晒鹽設場五日瀨東曰瀨南曰瀨北曰洲南曰洲北委員監督場丁晒配每百石給銀十三兩五錢廳中各館均須向場請配其運也有以舟者有以竹筏者有以牛車者此外惟竹塹大甲二處有自晒者餘無聞已其售也每斤十六文加釐金二文若買成石者每洋一元

加釐金一百八十文給鹽九十斤不加釐則給七十五斤此中各處亦小有參差各館視地方之大小定比較之多寡然亦有不均者卽如滬尾每年比較天平秤五千石合一三五三千餘石而上受制於大稻埕下見逼於艋舺之販館比較萬難足額故此館爲台北最劣之子館所恃者地臨海濱天氣晴暖魚信大來可以銷售次則望夏間瓜菜大熟可期暢銷予當接辦之初僅有日售二三十斤之事蓋以旣無瓜菜又無魚信也他館當秋冬時亦大都如是惟滬尾爲特甚耳至督辦則北中歸藩司南郡歸巡道全臺鹽課每年約五十餘萬元上下視爲利藪趨之若鶩亦可云謂盛矣然得之旣易失之亦易因之而身敗家隳者亦復纍纍

滬尾地勢背山環海與基隆比肩惟滬口向西基口偏北相距水程八十里旱道六十餘里滬基同爲北郡門戶而滬尾尤稱緊要蓋基隆口外有山可以憑守卽使進口登岸而距臺北尙六十里且中途又有獅子嶺五堵八堵等險可禦滬尾砲臺雖亦係坐於山腰然在口內半里許其勢亦開舒而不收斂入口後惟觀音山獅子頭尙稱險要

但敵荷小口則此二處亦難深恃餘均無可守矣日滬基雖稱總口而濱海可登岸之
小口不可勝計批吭擣虛深可慮也乙未春余擬請設立烽火墩臺議未上而和議已入
出迨日人來攻果不由基隆不由滬尾而由基隆之小口金山里登岸出意攻不備
在敵爲深得兵法在我則實屬忽略然而有地利不知有人利有善法不如有良將振
古如斯耳誠而非又諒彈中各變異因由更難測士番民風對利害各異民言前不將
砲臺本係明台臺甲午春始改造暗台設八百磅砲士隨亦甚多外垣勇雄擊申爲
管帶所駐四週皆砲房兵房均仿洋式山下半里許爲統領官駐劄由北更結兩營爲
犄角其勢聯絡頗覺雄壯統領所札之處即昔水雷局是局外於劉省帥創建中聘委軍
員教師學生督造水雷安置海口以防敵舟立法甚善嗣以海疆無警節省經費裁去
教師惟留學生數人乃至演放時不知藥線所在予慮以爲毫無實際遂如告朔之餼
羊矣不過爲安置閒散人員之地已耳噫中國於自強之道始欲化琦他日繼則願藉人
小費終則輕於一擲強微才以當大任迨無效驗則謂絕無可用棄之如敝屣嘗見有式

志識之商賈農工謀爲籌畫必見其實有利而後圖之卽不幸億則未中亦必千方百計以冀終臻於成功斷不忍以將成之事聽其中隳此在西人無不如是而我華人亦甚多焉然則以袞袞諸公膺國家鞏固金湯之責而志識轉出於商賈農工之下何哉吁不知此正袞袞諸公之爲袞袞諸公也

余嘗謂與洋人戰禦於水不若禦於陸敵以整不若敵以散此確論非闊論也聞滬軍中言甲申法人之役基隆爲所襲取轉而來攻滬尾時防守者爲孫庚堂軍門開華所統湘淮各軍而外又有十勇番勇法船至口外以小划渡其軍士登岸軍門揮隊出擊排鎗方施而我兵爲擊中者纍纍因而敗衄時土番勇居後隊遂各奮勇直前不排陣法不分行伍人各自戰而法人無一得脫點石齮齧報中曾繪生番洗剝洋人而食者卽斯役之事也蓋是時法兵輪泊於口外欲駛進而無潮難入欲開砲應援則恐反擊中本國兵士故登岸而返舟者絕無人焉此可辨於水於陸以整以散孰優孰劣也又可見人盡可用惟在將之者始何耳日人之役若盡歸罪於兵丁兵丁豈甘受哉

滬尾惟沿山一街約長三里許山上亦有小市不及山下之繁庶山下亦惟媽祖宮前爲最西至海關衙門以外若得忌利司洋行瑞記洋行領事府稅務司公館蟬聯而前直至洋海關止此外一片沙石礪礪磊磊再半里許則防營砲臺在焉港中帆檣林立之處以海關衙門前爲首蓋行廈門香港之得忌利司洋行輪舟皆停於行門行台北之小火輪碼頭亦在是處至商務局行滬上之斯美行香港之駕時以無碼頭泊於營門之時爲多行漳泉各民船則媽祖宮前與鹽館後一望皆是每當春夏之交輪舟載茶載腦以去民船載鹽載貨以來尤形繁鬧基隆遠不及也惟輪船進口必須候潮基隆可無須也故值風大之時口外難以暫停則往往先赴基隆以避之市居北岸東八里許山名獅子頭南岸名八里份廣漠無遮人烟稀少嘗乘小舟行其處惟見水石撞激而已卽海口也由八里份東行十里許名觀音山與獅子頭雙峯對峙爲由滬尾赴臺北所必經之地然由八里份登岸行觀音山後小徑十餘里可直達新莊由新莊折而北行十里卽大稻埕不必過觀音山獅子頭也

考臺灣周圍曲折二千里外濱大海內界番社府縣除臺東州恆春縣埔裏社廳苗栗縣外均係沿海爲治由北至南形如柳葉計府三曰臺北曰臺灣曰台南台灣卽台中始臺南爲臺灣嗣擬以臺中爲省治因移灣之名於臺中後復以台北爲省而名仍其舊台北知縣三同如一縣曰淡水曰新竹曰宜蘭廳曰基隆臺灣知縣四通判一縣曰臺灣曰彰化曰雲林曰苗栗廳曰埔裏社台南知縣四通判一縣曰安平曰鳳山曰嘉義曰恆春廳曰澎湖直隸州一曰台東州舊本四縣二廳新設之廳縣皆係割舊制以立者但往往已出此縣之境行別縣數十里又入此縣之境並非忽行內山忽行海濱縱橫莫定而卽如是此誠不知始之畫界者若何定也至地勢北高南下自以台北爲首台中爲腹臺南爲尾而以內山爲脊後山爲尾閩之極後山卽臺東州也所難者饒屬孤懸海外而又毫無屏蔽腹地港汊紛歧更無可扼守之處使敵人熟知地利不攻首尾直由台中登岸則首尾隔絕危在旦夕此當年有以臺中爲省會之議雖然以台北之金湯鞏固鎮之者尙不能死守况台中之無所憑乎至澎湖在台南府西二百四

十里孤居海中水勢落深海面窄於他處水如墨而洶湧土人呼之爲澎湖溝舟行其間咸競競焉輪船過時卽無風亦覺顛簸島長約百里寬三十六里故雖爲臺疆鎖鑰而一經巨砲卽不能守正以其地太狹也駐總兵一通判一以鎮守之其居民則異常艱窘蓋以地盡斥鹵砂石不能種植無以爲生除業漁以外別無糊口之法也

北路海口以淡水之滬尾基隆之基隆爲最要餘屬基隆者曰金包里曰三刀仔曰棧仔寮屬宜蘭者曰頭圍曰蘇澳屬新竹者曰竹塹曰香山曰中港曰後隴中路海口彰化之鹿港爲最要餘曰番挖曰王功屬臺灣者曰梧棲曰番婆莊近北路屬苗栗者曰大安曰大甲溪近南路屬雲林者曰笨港南路以安平之安平鳳山之旂后爲最要餘屬鳳山者曰麥寮曰東港屬嘉義者曰布袋嘴曰樸仔脚共二十五口尙有不著名者不能勝載

官場自藩司以至典史每歲均有津貼銀兩蓋以地丁平餘雜項涓滴歸公而按其缺之用度提公款以予之謂之津貼此亦劉省帥所定之章也然府則另有抄封縣則另

有子口不僅恃津貼也抄封者朱一貴林爽文事平後凡從逆者之田產全行抄沒充公歸府經營每年所入者報數寥寥強半爲知府事之利然亦惟南中二府有之北府則無也子口者於海口設卡征船稅也此項名爲指撥津貼然每年所征之數必倍蓰於所指之數也亦惟沿海廳縣有之內山則無也武者亦有子口惟所征較文者減倍耳

防營屯營平日綜全臺而核之不過五十餘營屯營者駐內山防番之營也其勇亦多係番人惟衣飾均改耳

臺人性多狡詐蠻悍狼勇好鬪稍有仇隙則勢不兩立軍械洋鎗處鄉則無家不有行路則無人不帶一鄉中有一稍有聲勢之人則羣聽其號令而莫敢違出入衙署干預公事不一而足如有不遂其意明則呼黨羽而攻之暗則事巫蠱以制之故地方官至其處必先求與巨室相得而後諸事可辦否則必不能安然亦有安分自守者見官則尊之畏之如奉神明故官果清正廉明亦尙易治但性既蠻悍是以盜風甚盛肅義雲

林臺灣彰化等處在在有之如簡大度卽盜中之卓卓有名者至竊賊則絕無也又最喜祀神鬼較吳越尤有甚焉媽祖宮無處無之媽祖卽天后也臺人呼之爲溫陵五媽不知何所本臺南有延平王廟卽鄭成功也臺人尊之爲開臺始祖廟極大祀極盛此外淫祠其數當以車載斗量有疾不求醫而惟求巫巫皆男者呼之家手擊銅鑼口吹海螺喃喃之祠與之相間不知其爲何語名之曰打銅尊之信之不敢稍褻此等人又善爲蠱事土人名曰做竅有隙者欲傾陷人則使其施法輕可使其顛倒昏迷重可令其死亡喪故做竅云者蓋謂雖無間而其法亦可中也故久於履臺者不敢以真年告人卽防此事也至病者既不求醫而醫道亦幾於廢是秋予在集集身患寒瘧闔局亦無一不病而求醫竟不可得遠赴彰化聘請而來者均屬碌碌醫既不精藥市亦不問可知矣竟至常見之藥而市中不知其名以致予病經半載而始愈嗟乎此邦人之動作起居真可爲行同化外矣


宮室墻垣喜用紅磚民居盡若廟宇惟規模均嫌狹小床棹椅橙多係竹器蓋以竹圍

甚多也然內山之楠杉等木亦甚夥性質重而工鉅故人皆樂用竹者土產用物若大甲草蓆澎湖海籐蠲鹿港龍涎香以及臺灣錦牛皮箱均可貴焉

食物以臺南之檳榔筭爲最貴重檳榔樹孤幹參天株高數丈毫不曲灣臺人皆喜食檳榔其樹甚多而保護亦甚殷故筭惟有爲秋冬風颺摧折始有攜入市者平時無人肯取以售也其味鮮甜惟多食則心中空疏如食杭州之毛筭然其彰化之西螺柑嘉義之麻豆柚均爲絕品至若黃梨卽波羅密釋迦番蒜等物在臺人視爲至寶在他處人不食者甚多又有南無者其形如滬上之水蜜桃然食之頗有蘋果風味予頗好之金焦果新摘下時味亦甚佳至滬後則味變矣蔗味之佳則人所盡知也

海濱魚蝦甚多而腥臭皆不可食土人則嗜之如飴市中售者奇形異狀莫可盡識百斤之魚爲恆有之物蝦之大者名爲龍蝦長二尺餘圓徑尺餘土人每食其肉而以其壳製燈可謂大矣蟹類亦極多其壳橫寬後曳雙尾者名曰蟬其壳直長而色黑後亦曳雙尾者名曰蚶雖尙可食終不如蟹之鮮美且其性較蟹尤寒故脾弱者不宜食此

二物閩浙沿海之處皆有上著均視爲至寶焉內山惟鹿極多鹿茸鹿皮鹿肉鹿肚石之類時有携出求售者惟此種鹿多係春冬之交沙魚所化者故其功用遠不及關東所產臺疆山雖多而無虎聞昔某巡撫覓虎二隻縱之內山欲其蔓生而制番人乃久之而並此二虎亦無蹤喜雀初亦無之至開省後始漸有然尙屬僅見之物也春燕秋雁亦屬希見黃鶯亦從未聞其聲蓋以絕無楊柳可棲也



憶臺雜記下

甲午正初以事赴基隆適逢八堵車路中斷尙未修竣至八堵下火車行里許方登換車時當宿雨初晴途皆泥陷步行時頗有蜀道難之苦

基隆廳署背山臨海勢頗雄峻惟大門外東方閉塞西方開廠且室既偪窄入其中復覺陰森之氣襲人故握廳篆者大都不能善去是豈陰陽生尅之說果不可不信乎恐然而不然也

基隆市面環海如弓背式甚覺寬廣繁鬧惟行其境如入鮑魚之市不可嚮邇然海濱大都如是不僅基隆如是也

砲臺有二一臨海口一在口內勢成犄角戰守皆宜而統兵者每以其差爲迎合上意酬答私情之用可慨也夫

基口兩岸皆山夾峙謹嚴不如滬口之箕張港中有小沙灘一區土人名爲小瀛洲遠望樹木蔭森人家疎落頗有逸致欲往觀以事冗須返滬不果

距基市十餘里山中有洞名曰仙人其中石子皆係五色斑斕且聞有可催生之說亦以時迫未往游觀

四月予聞改省之奏定因以周游南北所見風俗之濟民生之困與利之未廣兵之難恃抒爲條陳擬上闕府錄未就而奉調矣匆匆束裝因而置之細閱之在當時尙有一二可採者附錄於左

敬稟者竊維木屑竹頭安足供公輸玉斧牛溲馬勃自難入扁鵲膏囊然而滄海不遺細流方足以成其大泰山不卑土壤始可以顯其高則雖論異珠璣方召之節樓可上言同糟粕韓范之戎閫可陳伏思我 帥德業傳家經猷名世府開碧海看斯民枉席胥登節建赤嵌聽大地平成競奏固已金甌鞏固玉燭調和矣更何憂於葑菲之有遺而尙待於荔萑之敬獻乎然抒攄管中之見以盱衡海外之風竊有不可解者有深可憂者溯自建省匪不有年而不振之士風一仍於舊多財之黔首轉貧於今日樸實者競尙浮華直率者變爲機詐此邦之習尙斯土之瘠饒不優於前轉劣於昔是誠不可

解者也。民性多愚，海陬尤甚。既未教化，以開其陋。復重田賦，以困其身。竊恐稍有水旱偏災，蠻夷外侮，則內訌堪慮。土著莫防，况乎塞上屯營。非盡亞夫之部曲，城中守卒類多老范之軍容。是誠深可憂者也。久龍學未逢源，觀慚坐井。不及綠蟻之知水，非如老馬之識途。愧無穆穆皇皇之詞，徒吟言言語語之句。第恭諗我帥，虛懷若谷。舍己從人，立綱紀而古訓是遵。圖政教而庶言兼釋。爰集四事，綜爲一篇。倩管城子而錄陳藉楮國侯以上達，恭求鑑閱。尙祈訓誨臨池，無任悚惶之至。

將欲挾一方之隱弊，議民生之大計，則必熟諳其地利深悉其人情。然後掉舌而談，振筆而書。方能洞曲折中竅，要苟大力者採而行之。決無捍格不通之弊。卽卓識者鄙而棄之，亦無躁妄聘辭之罪。若龍者甫歷赤嵌，復乏學識，發一議立一說，詎非昧同嚼蠟。擗等隔靴然而體察輿情，集益衆思，厥有四事。允宜別治，爰以管見用成卑論。四事維何。一曰風俗宜正也。二曰田賦宜減也。三曰棉桑宜興也。四曰兵制宜更也。古帝王爲政治民，首留心於教化。堯期百姓昭明，舜命敬敷五教。蓋以教化不行，則風俗日漓。風

俗日漓則人心愈僞而世道隱憂均伏於此說者謂臺灣地處海陬情同化外而且人均蠻悍性多愚蠢教無可教化無可化不知方今台灣列入版圖普天之下誰非赤子古人於鹿豕之愚尙能使之周旋中折而况儼然人乎且天下無不可教之人亦無不可入之教台地風俗之惡甲於天下而淫風流行尤堪髮指失今不治伊於胡底是宜責之各學廣文夫廣文職司秉鐸位處閒曹身有教訓之權署無簿書之責宜令其日聚在庠者宣講討論禮義廉恥孝弟忠信切身近己之事日有程月有課錄其言記其行涵濡日久自能變獷爲薰然後令其分往各鄉各立一壇使其亦將孝弟忠信禮義廉恥之事切實宣講必使賢愚共曉婦孺皆喻習之既久聞之既深豈必難由漸入化共爲聖世之良民乎古之爲治也閭里之間皆有庠塾故卽輿台之屬牧販之子亦多彬彬有禮載在典籍可勝考哉今則異於古矣循循善誘不望之爲廣文者而奚責乎雖然亦必上官爲之督也其往各鄉則給以夫馬薪水之貲其定期則不可更移其從事則須嚴賞罰儉能化已而復能化人受上賞儉能化已而不能化人受下賞儉

人已均不能化罰士爲民表自古如斯士風丕變民風斷不全仍舊貫也台灣之風俗不正者良以無表率閭閻之士耳苟能如斯而行安知數年以後風氣不幡然一變於正又安知不因而化及熟番又安知不因熟番而化及生番將見泯強悍湍淫亂去機詐變蠢陋盡爲熙熙皞皞之民豈不懿哉倘再能多籌經費廣立學塾養其童蒙化其愚陋則幼而習之壯而行之其功尤百倍於口舌宣講之教也而或目以爲迂者斯妄人也夫絲雖焚理之可純火雖烈撲之可滅不求其本徒事其末則絲自終於焚火自終於烈昔韓文公守潮而潮士始篤於文行延及齊民號稱易治昔之潮今之台也文公行再見矣雖然教必能養而後可行也蓋富而不教必至流爲禽獸教不待富安能不相鑿柄夫人之一身晝則飢夜則寒卽父子夫妻之間教命均不相從况官長乎台灣本屬膏腴之區樓閣連綿畝畝縱橫者不知凡幾乃自清丈田畝以後昔之富者今且貧矣昔之貧者今且斃矣彼時以台灣開設行省需用浩繁而民間田地復隱匿太多故不得不一清丈藉以增錢糧而杜狡詐乃奉行之員徒存一損下益上之心索

賄肥己之念以少報多以瘦報腴比比皆然而於是臺民困頓矣甚至秋成所入尙不足以納賦兒啼婦號不可復耐遂機械百出變詐多端斯時而欲以吾之教入彼之心豈非南轅北轍相背而馳乎是非稍減田賦不可然如重行文量以清積弊而弊仍難清何則其騷擾民情一也奉行之員倘若不肖則富室仍可賄免而貧民難受實惠二也即使奉行者克己盡公而重量此縣斷不能不重量彼縣四處並舉太稽時日且時愈久而民愈不安三也事有名爲惠之而實爲殃之者此類是也則莫如取彼上則更爲中則取彼中則更爲下則取彼下則停其徵納三年俾稍紓其困而後一仍其舊如此則一紙官文而潤澤無微不至矣但國賦攸關豈能擅爲更改然而民之父母惻隱爲懷錄章入奏爲民請命 聖天子心存好生當不難頒浩蕩之恩田賦旣減民無飢寒之慮各得其所野無游民地多樂土蒼生感挾續之大德深浹肌髓移風易俗勢同破竹詎不俟其禱而或者曰賦則已定更改究屬維艱然又有法存焉聞各縣當清丈之時多有遺漏未報之戶他縣不知有無聞鳳山一邑卽有三千戶未經開

報但此項亦非知縣隱吞實緣賦則雖定而徵納殊難故留此以爲挪補之計現在似可飭令各縣於開徵之際稅契之時詳加體察如真係瘦腴倒置多少參差者核減更正卽將未報之戶抵入正額如此則無損於公而有益於民第須嚴定功令以勵各縣否則身憚勞瘁手假吏胥魚鱗冊未曾入目徵報簿不知其數而果屬清貧者仍難霑實惠也又有謂州縣詞訟案件尙且日不暇給安能細核錢糧而不厭不知臺疆各縣詞訟大都不多儘可一一詳勘况一歲之中有兩忙少則一歲多有二歲必可一勞永逸惟所難者無如許之公正廉明勤勞州縣耳雖然養雖至而利未興也在庶民尙難望元氣之頓復在公家則須憂度支之不敷則莫若興種棉桑或曰棉性惡風桑性惡鹹蠶性惡溼論此問之天時則無日無風論此問之地利則近海者地必鹹亦近海者地必溼是爲無一可者不知在海口則風必大在腹地則風甚微而臺北之風則尤爲全臺之最嘗居臺南每年不過發颶風數次耳初未聞無日無風也且棉畏風稻梁獨不畏風乎况臺灣地氣較熱田家一歲之收多至三次則種棉者獨不可以春日遭風

夏日重種夏日遭風秋日重種乎且棉最宜植於山地此間重巒疊嶺多於平陽獨不可以捨平陽而植山地乎是棉利之可興也明矣謂近海者地必鹹亦不盡然偷地皆屬鹹則臺灣之田何不盡爲鹵斥而轉多膏腴乎夫桑非膏腴之地種之不盛豈反不宜於臺灣乎謂近海者地必溼是誠然也但近日蠶桑最盛莫如浙江夫浙江地勢獨不卑下乎獨不近海乎卽以浙之湖州而論四圍不俱水乎禹貢獨於兗州言桑土旣蠶是蠶桑終宜於高亢之地然今蠶桑之興何以不盛於北獨盛於南乎是蠶桑之利可興也明矣特是棉桑之植種藝有法培養有法非可以造次言者事屬創始蚩蚩者或不肯以稻梁已見之利更棉桑未着之利是宜官爲創辦拓善於藝棉藝桑養蠶之人先擇公地而藝養之迨功效旣著獲利甚鉅則不待教令而民自願爲矣棉之爲利雖尙薄而蠶桑之利甚溥種一畝之桑利必再倍於泥土旡賦勤懇懇種一畝之田也且其益亦甚大矣民間多一亭桑則曠土可以漸闢閭閻可以漸無而婦女均有生財之道則名節廉恥均可保全况樹藝有成公室家尙可徵納布之稅詎非一大善

政也哉雖然利雖興而勢未強也內有生番之虞外有強鄰之憂勢苟不强將何以制此內訌外侮哉論臺灣之兵制若者爲防營若者爲守營防營則招自他鄉守營則別選土著固皆如荼如火可作碧海長城矣乃竊觀其將士則招自他鄉者旣鮮肅肅之狀而別選土著者更乏趑趑之形無事則虛糜廩餉有事則惟知奔北此其人豈盡不可用哉非也特用之有其法耳夫上古之時寓兵於農後世之不能行者以人日多而田日少也嘗考兵制惟管仲之作內政與唐太宗之立府兵合於古宜於今爲萬世可師之法竊謂方今臺灣兵制正宜仿管仲之寄軍令於內政而參以府兵之則防兵宜興屯田之舉守營宜改團兵之制曷謂防營宜興屯田夫防營之兵盡招之於荆楚淮皖之間苟非家無立錫與素係游民孰肯不遠千里隸籍於細柳營中迨作兵旣久而又值無征戰之事則性成懶惰不堪用矣故在古則趙充國諸葛亮在今則左文襄均以備邊之兵爲治農之民蓋一則可以壯飽騰之氣一則可以祛委靡之習法至善也况臺灣曠土甚多胡不可以懇而耕之第屯兵之處無田可耕而有田之處非兵所屯

未免相左耳然豈不可以更替而爲乎如一營驅爲二班春日使上班往治之夏借使次班往治之互相耕耘詎不足以均其事而節其勞乎如謂士卒旣令荷戈復操耒耜匪特身所不習心所不安甚或引以爲恥但收穫之粟自留用之外官爲收買轉以發商則士卒有利可霑詎不樂爲乎夫然而平日旣習於勞苦多事豈畏於征調而訓練之方尤不宜泥於洋操何則洋人陸戰陣法多好排比彼以排比來我以排比從而我之槍萬不如彼之利是卽令孫吳當之亦難止兵士之潰敗惟有出沒不測零騎不整可以制其死命甲申孫軍門敗法人於滬尾卽深得以散不以整之力也行之旣久軍容自蒸蒸日上雄長海外矣然守營改團兵之制尤宜亟也蓋守兵之不振天下固然國家以不資之費養此無用之兵將何爲乎是宜合其鄉而制爲軌里擇其人而不選城市裁參游都守千把各員仿防營之派人統帶禁頂替賄補傳子陋習較守營之口糧加倍郡各千人大邑八百小邑五百春夏亦分其人爲二班聽其耕治秋成歸營但以一歲爲更替耳地處海濱水戰尤當留意士人於伏水一道必多善者惟宜精益求精

求精蓋其鄉制爲軌里則出丁無所推諉而軌長里長各有專責也其人不選城市則游手好閒之輩不得入其中而勇氣始銳也裁參游都守千把以其積習太深治宜求本也禁項替賄補傳子陋習以便挑換隨時餉不虛靡也郡各千人大邑八百小邑五百防尾大不掉之弊也聽其耕治使其不染軍營氣習不荒田野本業而即以勞其筋骨也勤習水戰欲其人地相洽也而尤有進者無論防營守營當秋冬講武之暇令其將領率營兵之半巡行各縣次年則率其未經巡行者周歷各處如此則既可以化驕情又可以諳地利復可以見彼此之優劣而何方有事一經調遣則自能熟悉其處之關隘險要防營固無論矣守營當隣境有事亦宜分其半以往拯之庶無失團兵之意義或曰台灣人性恇怯蠢愚豈足恃爲緩急不知楚材楚用彼其盧墓於斯室家於斯焉有捍衛其桑梓轉不如防營之保障他鄉乎昔滬尾敗法人一役詎非土著所爲乎尙可云土著不可用乎惟是選兵必先選將非然則與今之守營等耳奚改爲哉尤有可疑者台灣爲東南門戶何以海口絕無兵輪駐守此亦大可憂者也吾知必行將籌

及矣

五月子奉藩憲札調埔屬集集街腦務局鹽館交代事畢於二十二日挈眷起行乘火車半日達沂竹縣城內尙覺繁庶西門外亦稱鬧市次日乘肩輿行四十里歷中港至後隴尙屬新邑次日復行五十五里歷吞霄防里溪至大甲溪屬苗栗縣境次日復行四十五里歷大肚溪牛馬頭至彰化縣城大肚溪牛馬頭屬台灣縣境彰化即台中府駐劄之處副擬以台中爲省治遂改名曰台灣時守府者爲陳仲英太尊文縣知縣者爲丁調臣大令雙城內寬大宏廠街市甚爲富庶縣前一帶全係鬧市北門外亦爲商賈薈集之所南通嘉義縣以達南郡北毗台灣縣以至北郡東連埔裏社以撫番社西濱大海誠爲台灣咽喉心腹之地城東南有八卦山登其上內可以見全城外可以望滄海爲一郡最險要之區上建砲臺駐兵守之

防里大甲等溪內容山水外接海波均溪中之最險者防里溪寬十七里而水不甚湍大甲溪寬八里而水甚急惟溪中沙洲石灘甚多相距半里許始現水一道有水之處

面不寬而流如奔澎湃之聲在遠卽聞蓋水底皆石石面卽水方圓大小礪磊峻嶒故非臺人行其間者時有傾跌之虞夏秋水漲則有數處有舟筏候渡冬春水小行者卽從水中過或駕以竹橋予過溪時在輿中頗慄慄危懼而輿夫行若無事此在他省輿夫除川中外恐無此足力也惟行此二溪必須輿夫肯行方可前進蓋彼等往來既多善觀雲氣若見前山黑雲上蒸則斷不啓行聞昔年有人急於行路見雲起而不肯駐足行至溪底內山之水驟發趕擇洲灘高處息肩水勢已滔天矣候至七日尙不能過人皆待斃因脫短衣取輿扛縛其上四面招展以求救援岸上居人冒死乘筏以往方得誕登彼岸險矣哉昔岑宮保毓英撫閩巡台時擬於大甲溪建造鐵橋以鐵籠置石沉於底以爲橋脚乃不數日而遽爲水冲激入海現在鐵籠溪邊尙有存者台灣之鐵路不能徹南北者職是故也聞英國沒爾水河底尙有火車不知其徑若何開鑿現臺爲日所據日能效西法第未審其於此二溪有良法以籌之否耶恐西人雖巧亦不能遏使山水不挾沙石建瓴以下也但傳聞路已通矣

予在彰官樣事畢休息二日復乘肩輿東行二十里逾同安嶺又二十里至南投宿焉次日復行二十里過草嶺此嶺較同安爲險峻過嶺時數勇扶輿以行輿夫尙喘若吳牛逾嶺行五里至集集街是處四圍皆山若居釜底再東六十里爲埔裏社廳城街長不及一里規模局勢均甚狹小初人烟寥落迨設腦局後各洋行分設收腦棧始漸臻於盛然日用食物缺乏尙時形焉予於六月朔接受關防任事按腦務局北中郡共四征數以北郡之大拉崁爲首次則中郡之大湖一名單蘭屬台灣縣境再次則集集街林圯埔樟樹多生番社故腦竈均在番界熬之者以十鍋爲一竈鍋大如面盆上覆以尖底砂缺取樟樹加水置鍋內以樟木文火燒之晝夜不息使熱氣上騰結於缸內速則十日遲則半月將沙缸去下掃取樟腦於是告成有腦戶腦丁腦戶爲竈之主腦丁爲竈之使設竈之處多係山僻之地或以草結屋或以板營屋不殊幕天席地食物既須在山外購取且時有生番出草出草者生番殺人之謂也故腦戶腦丁非數十人不敢居內非攜帶鎗火不敢久處卽數十人矣攜帶鎗火矣尙時有來局報腦竈被毀腦

丁被殺之事然其害雖大其利甚厚故熬者趨之若鶩每百斤熬就出山約須本洋十三四元而售諸各洋行三十元之時居多除完釐外尙可多七八元洋行加箱轉運香港則每箱少可售五六十元多至八九十元不等各洋行名爲收買實則皆自行設竈不過加以腦棧名目避洋人不通商內山之約爲掩耳盜鈴之計征稅名曰防費爲防番營勇之糧餉起見也以一竈爲一分每分月征洋八元給執照門牌以爲信其或因事而停因舊而改者免征或年久樟稀者減征大抖嵌竈約三千分月實征銀一萬餘元至二萬元不等大湖竈約二千餘分月實征銀七八千元至一萬元不等集集街竈五百餘分月實征銀二千餘元至三千元不等林圯埔竈約三百餘分月實征銀千餘元至二千元不等全臺腦務每年約共征洋三十萬元而報部者不過七八萬元然各局皆與番爲隣番性不常一經騷擾必大減色如甲午秋冬季生番四出變亂而各局皆頓爲少征即可證也故腦戶設竈之時必先赴局稟請須察看有何處番社以示准否卽准矣而腦戶尙須約同通事入番社與其頭目商妥約日邀其出山設牛酒以大

會名曰和番此後彼且可爲保護然或小有齟齬害卽隨至誠所謂鳥獸不可與同羣也內山多係番社不計其數社有頭目有通事大者萬人中者千人小者數百社各自治無總頭目有熟番有生番熟番者曾經受撫之番若大崙若單蘭均設有撫墾局熟番至局例賞酒肉惟其喜飲而易醉醉後往往肇事其形狀與我人無異惟稍覺粗黑耳然亦頗有清俊者足底厚數寸於深林密菁之間步履自如蓋以終身赤足也其服飾冬夏皆不著衣褲腰間或圍以紅羽毛或圍以白布被髮穿人骨爲圈以束之熟番間有入城市而服衣褲者然百中不過一二赴台東州恆春一路有數處須番人爲輿夫彼以頭頂輿扛而不以肩荷輿不能直行之處須其劍負以過蓋有數溪急湍更甚於大甲我人斷不能行也事後與紅羽毛數尺卽歡躍而去以爲得所服也其於倫理惟夫妻之道最嚴夫倡婦隨寸步不離婦之面夫必文之以爲識其得妻之道亦甚艱不論門第不論家業惟視其能殺人與否多多益善如能殺數人則合社稱爲英雄妻財均隨之而來否則人盡鄙之其性喜殺人亦爲勢所迫也惟可怪者旣殺其人則

將其頭攜入家內奉之如神明以酒肉填塞人頭滿口彼則對之跳舞唱歌以侑享每
出草必祭之而後去設有所得返則如前酬祀無所得則將其頭擲撲於地而便洩之
此則不可以情理喻者也其所居無宮室或依山巢穴或結草爲廬食物則喜野獸初
尙茹毛飲血嗣亦知鹽梅調和矣其技以火鎗爲最發必有中且慣於荆棘成林之處
或坐或臥昔年剿番之兵不能得大利者以此也然彼不能製火藥若嚴禁不准入山
何難剿服不知每當互市之時彼以鹿茸鹿肚石熊胆等貴重物與我人換少許火藥
孰不樂從况臺人無不有鎗卽無不有藥且每當出草後官始而詰責絕其貿易迨勢
窮物盡向我求和孰樂剿而不樂撫乃利後復漸蓄積蓄積既足則又出草此所以勢
難禁絕而反覆無常也其心亦甚巧善於織布所織如斜紋布然皆白色係以麻和樹
枝絲織成者故夏日服之最宜性雖野悍亦有知重義氣之番昔有服官此間者蓄小
番二人爲奴後此人遇禍而番奴亦殉之娶番妻者吾曾數見深爲馴謹契合諒番
奴事非虛也

集集街東至埔裏社城重山峻嶺視蜀道爲尤難夏秋交午前必晴午後必雨行道者艱苦異常且早至土地公嶺東望惟見白雲幔罩濁氣籠騰必至己午方見雉堞足見瘴嵐之深重矣集集街在遠望之亦何莫不然耶

中路各腦局本轄於臺中府繼改歸雲林縣管總局甲午秋仍歸臺中府予受事之初尙歸雲林兼轄因乘輿過濁水溪行二十里至林圯埔又二十里至雲林縣時知縣事爲程玉堂大令森按縣署本設於林圯埔嗣復改設于斗六門卽今之縣治也斗六門昔爲嘉義之一鎮市也只一街長不過二里亦不甚富庶本設一縣丞嗣遷設縣丞於鹿港縣署卽昔之廳署也以縣署尙未竣工故暫設焉無城惟以竹刺爲圍藉以分城鄉耳林圯埔之縣署既屬無城又不在于街內巍然獨立於田中四面懸空建造者亦大奇矣予行經時惟見土牆時立而已蓋磚瓦木料均拆往斗六門建新署矣

臺中土產以米爲大宗每行年於漳泉等處者約二三百萬石亦間有赴東洋者多係臺灣彰化嘉義等縣所收由梧棲鹿港等口而出然台北每歲尙須赴滬運米蓋以由

中至北旱道水道運費皆大而至北所獲無多故無人運往也

六月中閩省報知日人起釁遼東矣各口當嚴加防守募軍置械紛紛如也是時唐薇卿方伯景崧奉幫辦海防之旨復飭廈門提督楊西園軍門歧珍南澳鎮總兵劉淵

亭軍門

永福

來臺協辦軍務均駐臺北四帥聚於一城已非良策繼而遣聲名卓著之

劉軍門防守臺南計更左矣何則臺疆以臺北爲首軍火糧餉商賈貨物屯聚於斯精華薈萃之地敵人必先注意臺南雖係要口然自設省治變爲尾閭即使先失而北路節節有阻尚可挽回試觀凡百蟲物去其尾尚可求生去其頭必至立斃是可證已設使劉軍門駐守台北足食足兵豫事布置日人必畏其先聲不敢輕犯觀台南之事可知矣予有句云軍威問孰超劉錡用與才違莫可爲七月抄琛航兵輪斯美商輪行至澎湖見有運船一隻飛駛以過琛航察其並無旗號因懸旗詢問示其停輪乃該船漁機愈加開足忽懸美旗忽懸德旗忽懸法旗我兵輪愈加疑惑追躋而前懸旗以示如不停輪卽行開砲該船始行停泊是時斯美亦幫同趕追業至福建同安之白狗山洋

面問該船究裝何物究係何國含糊以對我兵輪商輪遂共押至基隆撫憲飭臺北府至船驗視乃該船執定條約謂非稅務司不能開艙臺北府遂廢然而返迨飭稅務司赴查始悉船爲英船貨皆軍械因電達上海飭查英官反加臺灣以忘拿之名請爲釋放當事者亦莫敢稍違縱之以去查萬國公法有兵事之國不得向各國購買船械各國亦不得私相售予立法甚嚴若云該運船係我中國私向彼買者則我沿海各省未必不知何至於冒昧忘擊卽或不知當弋獲時該運船何不向我兵輪說知何以旗號旣不定言語復不明其非爲日人之物何耶英官請釋並不查勘明白而遽行使去何在位者皆胆小如驢鼠耶嗟乎此所以外人之猖獗無底止也

九月邵小村中丞調撫湖南唐方伯權撫篆斯時敵船在南洋游弋不定砲臺時有所見然未聞有遣以炮者聽其自來自去而已但各口多係如是不僅臺灣爲然也

臺北城內新設籌防局一在新建之行臺署內以藩司督辦之亦不過承上啓下文書往還已耳未聞設一奇謀施一新法也湘准土虜諸軍全臺綜計業逾百營而當事者

出示須募成二百營以多爲貴果何益乎

邱仙根主政

逢

甲臺灣縣人建議募義軍四十營自備軍械官給口糧歸其統領乃募

之數月只成八營迨事迫檄調回倉卒復就數營烏合之衆本不可用甚至藉有軍械而爲盜者吁達人早知敵人不來則已來則必不可守也

乙未正月予以事赴臺北二月返是時官場皆知日人停戰議和並有謂和局將定者兵事絕無消息洋面亦頗安靜予以去歲錫候七先叔仁伯大先兄逝世寡孀孤弟均在予處本寓臺北防務旣起長安大不易居彼時以爲旣經議和則臺疆可以無憂因移住彰化以便公私兩顧乃移未十日而澎事卽起然尙未料不奪而予也

二月二十七日天將暮時予在臺中府署謝子笏二尹指處正暢談間忽聞雷聲殷殷自西南來初以謂臺灣雷本早發不以爲疑繼又聞數聲出而視天則無片雲且雷聲不應久於悶悶羣相猜度以爲敵船在嘉義一帶海口施砲然究不敢臆斷也迨返寓聲發不止門牕均搖搖震動徹夜如是不能安枕次晨亟赴王槐三丈尙型處探聽云

係敵人攷澎湖昨宵北垣有電至府飭一律嚴加防守午後赴府署則又接北電云敵船中傷小却是日轟轟之聲仍不息入夜尤甚至四鼓方絕羣尙喜謂敵船被我砲臺擊走也二十九下午接北電始悉昨日敵人在前盧攻而繞道登岸直至砲臺之後軍士見前後受敵羣相譁潰而周鎮軍鎮邦朱太守尙陳別駕步梯尙在陸路迎擊終以寡不敵衆相繼乘小舟至臺南而澎湖遂失嗟乎假使臺灣有兵輪數隻駛往救援敵人未必不棄甲曳兵而走此予治臺妄議內有臺灣無兵輪之疑也然澎湖此次尙勝於旅順威海敵未至而先遁者也

是時全臺皆爲震駭調兵遣將日不暇給而居城市者多遷至窮鄉僻壤攘來熙往紛紛不已嘉彰一帶土匪有勃勃欲動之勢予以局在內山眷在府垣值此多事不暇兼顧因遷入集集街而自澎湖失後日人並無一船指臺嗣乃知維時李傅相赴橫濱議和眞停戰矣

時防臺中者僅楊觀察汝翼林觀察朝棟林士著也守臺北者已將百營而復調林觀

察至北駐守獅子嶺臺中遂甚覺空虛當事者復下令能募一營者無論何人卽爲營官於是廣人湘人淮人浙人閩人紛紛領餉招募烏合之衆布滿臺北嗟乎韓信將兵多多益善果如是乎予雖不敏逆知其非但無益而又害之也因擬議上啓撫帥維時臺北早知和約已定全台割予矣惟僻處南中者不知耳稟稿附錄於左

敬稟者竊自日人渝盟荼毒我民生憑陵我疆上巖關天塹武騎材官胥歸無用志士聞之罔不髮指台灣孤懸海外尤爲敵所垂涎幸我帥威望素昭佈置周密故敵於澎湖一試伎倆而片帆不敢指臺但敵人無厭輕生一旦兵力厚集難保不狡焉思逞停戰之說恐係藉以懈我愚意度之敵志多詐敵欲甚深和議恐終無把握然我帥韜鈴夙優胸有成竹萬一前來侵擾必能使其噍無遺類悉化沙蟲復何慮惟久龍伏思北洋軍潰之由厥弊有二一曰招募濫而餉糈微也一曰守西法而滯兵糧也太凡用兵之道貴精而不貴多胡文忠言必有所忍乃能有所濟必有所舍乃能有所全若處處設備卽十萬兵亦無尺寸之效又胡公於招兵必首選營官非若今之旣招兵而

後求營官此卽所求爲廉幹智勇之士而上下之情相睽已難得其死心况爲不肖者乎就全臺而論有四五萬甲兵捍衛守禦已綽綽有餘竊擬就現在所有之營裁其老弱浮滑者留其精壯誠樸者而徵人不可用閩人不可用裁汰之卒卽送出境以免滋生他變統將營將尤須先行考核工應酬者必貪而怯言夸大者必驕而惰此類用之必致債事夫天下無必勝必不勝之兵而有必勝必不勝之將至於餉糈竊謂宜增兵凶戰危以區區之資何能得人死命况現在之禦強隣較之靖髮賊其難易迥別乎我兵之甘爲敵人用者亦以彼之餉糈厚耳似宜少招兵而多增餉士卒感激入髓自能竭力疆場以一當百而奚必以多爲貴乎昔曾文正用兵必使其無內顧之憂卽此意也特是營將多善剝削恐實惠難以下逮此營將尤貴精選也溯自海禁開後各省兵士均改而習鎗礮以爲非此不足以與外人抗衡也不知鎗礮利遠而不利近宜合而不宜分舍而不用是爲迂取而全用是爲愚嘗讀紀效新書見其鴛鴦三才各陣長短互用分合自如大之則數百人爲一陣小之則一哨人爲數陣竊謂以之制敵於陸實

合於用敵之進也多排整施放洋鎗我則四分五散可東可西傍林倚山狙伏而進鎗子之來可以遠避迨其放過則又踴躍前行及其近也則敵之鎗化爲無用之物而我之兵盡執有用之器敵板我活敵勞我逸一鼓殲旃亦屬易事較之盡習洋鎗旅進旅退一人傷則全軍俱潰者孰優孰劣不問可知竊擬每營以七成習鎗礮三成習刀鎗行軍則鎗礮隊擊之於前刀鎗隊由間道繞敵或左或右或後突入其陣直衝橫截敵且有無從措其手足引領就戮者或又謂籐牌亦宜於用惟籐牌只可禦鋒刃而不能禦槍子愚擬改其製以革爲裏上鋪棉絮再鋪以絲棉外蒙以細綢內外以細竹片夾釘庶招風而不致爲風所颺如此製法槍子或遇滑而難入所慮者恐不能經雨倫其可用宜令其與刀槍爲一隊每隊十人二人執牌居先主衛次則四人執長槍主刺再次則二人執長刀主擊後則二人執短刀專主前者擊刺中敵則割其首級嚴立軍法有進無退牌兵死則斬鎗兵槍兵死則斬刀兵申明號令使其隊各自戰卽遇事急路狹一隊亦可分而爲二昔戚東牟之立此法亦因南方山林叢雜如此則無擁擠失事

之患竊謂仿而行之有利無弊卽或目今時勢已迫不及更法亦宜稍加變通萬不宜泥守洋操致將來自遺貽戚而尤有可慮者焉濱海之區有延袤數十里而閭寂無人者如新竹至後隴一帶是也日人最善由小港及無人之處登岸而此間汊港紛歧曠野連綿無處不可登岸設使徑用小船偷登分馳南北則我將驚惶無措首尾不顧大有束手就斃之勢然而分軍防守不特防不勝防且亦無此軍政計惟有由北至南相距一二里之遙卽設一烽火墩臺各二名兵住守倘遠見敵寇登岸則速舉烽火左者右者一時連類同舉不半日間而全台盡知庶戰者守者均各有備而不致倉皇無措竊以謂電音雖捷然機關須擇地而設此則可星羅棊佈於鄉野實足以輔電報之不及也更有宜設者敵人工於偷登小岸其登岸也必用小舢板當此之時我軍雖見其款乃而來而亦無法阻拒何則舢板行於海濱忽出忽沒大砲旣難施力而洋槍礮力則我遠遜於敵不特難以命中我兵且有驚惶先潰者竊擬於沿海一帶或倚山麓或傍民居相距百步設一小暗砲台內置格林砲一尊其砲台不須精緻惟須以隱藏

不露爲上以十兵管理一處偷見敵用小舢板登岸則四處轟發苟能擊沉數隻彼必不敢近岸敵欲攻燬則不知我之砲在何處此法不僅禦敵於水即使登岸我亦可四面兜擊擾亂其心志轟擊其陣隊較之用洋槍對擊者必勝萬倍惟須擇廉幹勤快膽壯耐勞之員分段督理方可得力又此法亦可施於商船之中平時則泊於港內迨其前來則出港游弋見敵舢板開砲轟擊彼兵輪上或用大砲擊我則可忽東忽西砲碼萬難命準惟所憂者難得如許之忠勇人耳甚或通敵輸情則反爲害矣然而現當多事之秋人才薈萃况夙稔我帥知人善任偷蒙俯採葛藟則濟濟者皆可因材器使也大抵我軍禦敵於水不若禦敵於陸禦敵於陸又不若不使登岸爲愈也管見所及用敢錄陳伏乞鑒督而訓誨之三月二十日

集集街乃內至埔裏社外至彰化之要道且旁通臺灣雲林二縣歧路四出宵小易藏局內本有屯勇四百人駐防然多老弱疲軟兵事起各洋行羣至局請添勇防守因稟請由埔裏社屯營撥兵一哨駐集並請將現駐屯勇裁撤由局另募精壯防勇以資得

力均奉中路腦務總局署台中府孫蕙齋太守傳覓照准屯兵於三月初移札防勇則擇於四月朔成軍委胡弁玉良督帶歸局節制乃是日甫行成軍卽接府友來函云割台議定限二十日全讓囑將局事作速料理接閱之餘大爲驚駭不禁上爲朝廷哭下爲台民哭再爲四海之百姓哭嗟乎台灣自康熙二十二年入版圖至光緒二十一年二百一十三年中經六事有數矢刀小亡於大國而亡於小國不棄於兵戈而棄於揖讓何我朝廷之忍恥何我台民之不幸而四海之子姓當痛極憤極之時必有不寒而慄者矣嘗聞繆獻甫孝廉談及程挺生太尊一語言同治甲戌年福建有某司馬擬赴台灣當時有陳司馬某程二尹某二公力勸某司馬萬不可至臺某司馬初不爲然二公勸之愈力某司馬詳詰何故始不肯叶繼而曰無他吾昨至陰曹見臺灣劫案已定萬不能逃君去適罹其禍吾不忍知而不言也蓋二公相傳皆爲陰官或每日一赴決事或間日以往訊斷皆不定而見其緊閉門廳長臥則其時矣此爲福省人所共知者逾數日二公復向某司馬曰今可亟去矣某司馬異其反覆則曰鐵案本不可移昨經關

聖帝君向天帝再四奏懇暫寬劫限二十年祭臺民究知過否再行定奪繼而日人果冒然犯臺由恆春登岸盤踞數日酬以銀四十萬而去云云予復以此語詢諸王桐封姻丈錫圭云果有此事程二尹今尙在福孰知甲戌既過而甲午難果與耶此姑無論斯語是否不經之談然即使事雖前定而究屬人謀之不臧也噫

初三日予以各腦棧欠繳征項爲數甚鉅而割地之信彼等復先知窺其意欲求免納予再四敦迫始各限日以去然究當作如何收法不得不稟承總局指示因於是日赴府日暮抵郡卽至府署謁見孫太尊稟商一是時林圯埔局員徐笠峯二尹亦以此事來府同寓於王槐三丈處初四日晨同返予行四十里至南投日之夕矣遂借宿於吳吉儀茂才家茂才南投之巨室也予往來皆借寓焉是夜卽聞有潰勇土匪相繼而起沿途搶劫紛亂如麻草嶺濁水一帶不計其數初五日晨欲行衆皆力阻云非有勇護送萬不可輕進予尙猶豫已初忽傳有屯兵營某哨官某幕友昨宿旅舍今晨行至離南投十里地方爲匪人劫其物傷其人不能行矣時吳茂才於前一日赴他鄉午關

宅隨護者十數人均執械土著皆如此可知其勢之盛也予隨帶祇二勇難資護衛因
草字飭一勇由間道至局飭派勇來接申刻胡管帶玉良率勇二十名前來迎迓謝汛
弁飛鵬亦隨來吳茂才復代覓南投土人二十名迺由山徑前進夜暮時深山重嶺
疊行之頗爲艱難與夫滑跌屢屢至同時業子正矣時見一街之人盡傳匪人卽來劫
腦局劫腦行驚惶莫措予以深夜莫辨虛實惟飭防勇營官胡弁屯兵哨官張弁劉弁
及汎地謝弁共相嚴守柵門慎加防維靜以待動而已而徐二尹行四里至社頭竟
爲土匪擄去嗣經設法贖出險矣哉予可謂不幸中之大幸也而臺民之蠻悍於此可
見一斑矣

宵

初六日聲勢尤甚匪黨昨宵遣人來言倘給以番佛四百尊則可保無虞當經申飭斥
逐故彼類決欲得而甘心也遙見三五十人一陣六七十人一隊攜帶軍械由街南北
溪底過者不可勝數諸弁屢請出擊予謂防勇成軍不及十日未經訓練而屯兵額旣
不足卒監監羸弱皆不可用雖合之有五百餘人以之自守則彼類不知虛實必不敢冒

然來犯設或一擊而敗則反成開門揖盜矣况匪類數既無定人皆亡命突然出擊殊非知己知彼之道因以西柵門責屯兵與防勇共守東柵門責防勇守飯食休息輪班更遞鎗火軍械不准離身而街旁之各柵門則令以腦箱裝土疊而塞之一面飭勇賁稟由間道至府請援一面招腦丁一百二十名至集防守自帶軍火局給口糧名曰鄉勇飭其於四面設立望臺晝夜眺望又飭各洋行自行雇募腦丁番丁家各自守予則偕賤友祝子誠兄慶年文案友曾南金兄宗濂督同各弁四處梭巡嚴稽勤惰外來游手好閒者驅逐出街匪類見內守緊嚴欲用火攻是夜忽降大雨詭謀遂不得逞

初七日勢稍解匪黨尙時至柵門外窺伺均閉鎗擊退仍督各弁嚴察堵禦初八日匪勢如昨午間由府遞來北電云割澎不割臺實北垣靖匪之計也予因飭召總理陳長江至集令以此電示之囑其設法諭散匪黨否則事平後定須稟請懲辦陳長江者集街之地惡而充鄉約總理者也素與埔裏社廳潘懿通守文鳳有嫌故藉割地之變官法不行糾合黨類思劫廳署乃行至廳城防備甚嚴志不得逞遂返而思劫腦局

又以嚴堵不能入誠爲此輩之罪魁禍首也迨經示以北電阻覺惶遽卽唯唯以去午後遂見匪類紛紛由溪底回山外行矣此可證其勢力之大也是日去府勇返云北至新竹南至安平匪徒充塞途皆不通是夜東興怡記等洋行由南運來之銀五千元煙土數箱在路均被搶劫惟北中路起匪之由則以林觀察前月遣員至臺彰一帶招募數營行至新竹忽令散軍蓋以己知割地之信也於是所散之勇沿途作匪以至如火燎原若臺南則本有數匪首藏伏如簡大度輩是也一聞和議遂與北中路同起此無足怪者數日來行道被劫者不一而足府城竟有始出城門卽遭搶者尙有起謀欲劫府庫者府尊亦如臨大敵兢兢自守予數日間袖鎗懸刀晝夜不能稍安蓋土崩瓦解之勢雖大智大勇亦莫從施其力也處此者能無慄慄危懼乎

初九初十漸次解散惟濁水溪草嶺等處尙有一二起人作斷路生涯時北中南三郡均遣營沿途剿殺臺南則斬首者四十餘名五月杪予行經其地尙見路傍纍纍若也十四日府尊遣羅松雲二尹樹勳帶勇一營至集巡查而匪類始全行潛藏予因日來

異常勞頓去歲所患瘧疾復發

十八日予遣眷由北郡先行附輪返申予亦赴府見府尊力陳病軀難膺重任請委人接辦而府尊不允予遂暫寓於王槐三丈處藉以養疴

二十八日予在府府尊示以北電云士紳公舉唐徵卿中丞爲總統劉軍門爲大將軍改臺灣省曰臺灣民主國定於五月初三日恭上總統印照萬國公法爲自立之國以與日本抗衡時邱逢甲主政復遍貼四言諭示略云日人暴殘宜起義憤得敵將首級者賞若干得兵敵首級者賞若干一時街談巷議壯氣勃勃昔之蠻悍者均變而爲義勇矣然巨紳大商由鹿港梧棲等口乘商船逃赴漳泉二州者不一而足米石亦紛紛出口不守禁示而各巨室之藏鎰亦卽裝於米囊而去人心不固早知其議論多而成功少也

五月初六日予返集以府允委人代辦料理局務也自予晉府惟祝子誠兄督同各哨代爲巡防頗覺安靜胡管帶則以送眷赴北前數日防守惟胡管帶最爲出力胡紹興

上虞人與予曾訂蘭譜者也

初七日午後正滂沱大雨忽有腦丁來局報曰潘通守家眷行至土地公嶺草中突起匪人六七十名蜂擁上前斷其轎扛劫其行篋旁有一腦丁欲爲勸解卽以槍擊斃之予急派勇飛往迎逐一面命嚴加守備防其反突至暮陸續而來最難爲情者爲通守之孫少君以輿爲匪類所毀倩輿夫扶行下嶺由嶺至街路距八里而又值大雨不已苦矣哉所幸脊口雖受驚而尙未受傷耳在局休息數日始去

初九日胡管帶北回王桐丈有書來云唐帥初二日接總統印願緝亭方伯筆烈於是日附輪內渡予眷亦於是日始行是時北垣城內外兵民紛紛皇皇已成亂亡氣象而撫轅中軍李文魁尤屬橫行惟各洋行依然不動云李文魁者徽人也本爲撫署親兵什長緣事責降爲兵復以事斥革孰知彼實哥老會匪中巨擘親兵隊中素所尊服者也先是四月十八日唐帥家眷內渡所有搬運行李下大稻埕駁船均係親兵唐帥賞洋以酬衆勞乃方中軍侵吞過半實惠不能下逮兵士知之敢怒而不敢言至次日

親兵正在搬運方中軍持械立大堂督其勤惰所負之物稍有碰損而方中軍遽行大
詈並以械擊之兵士初尙忍受迨由大稻埕回而猶中申怒詈衆親兵遂一擁而上拔
刀亂揮斃方中軍於刃下衆兵知事難了洶洶圍聚大有反逆之勢唐帥急閉宅門深
藏以避楊西園軍門時駐節試院聞警帶兵來援行至轅門惟見鎗子如雨自大門出
軍門亦飭兵士開鎗回擊惟時左近居民因觀望而斃者不計其數繼而淡水縣李麗
川大令前來再三撫慰問其所欲始言如以李文魁爲中軍則可相安於是唐帥急召
李文魁授以中軍李文魁之猖狂遂自此無底止矣迨五月初間基隆事急文魁服洋
裝率領多人至撫署請見言多不馴其隨帶者皆掛刀立於階下若有謀逆之狀時侍
側之葉巡捕覺其事急自語唐帥亟送其行而免危嗣後在台搶劫擄掠無所不爲直
至閏五月滿載逃至廈門以黨類自攻爲楊軍門訪聞拿獲梟首天網恢恢疏而不漏
跋扈果何益乎夫李文魁固不足論若方中軍者可謂不識時務唐帥則不知擇將不
善將將之咎亦不能辭此所以臺灣之民未受敵人之荼毒而先膺亂勇之鋒刃也

自四月抄日船屢至口外遊弋欲登岸而不敢冒然從事至五月初李伯行觀察乘輪至基口外與敵人交割後而敵船遂蜎集矣然尙猶豫祇以稔知台民義憤填胸也唐薇卿中丞接總統印後遍出告誡皆激厲民心之言讀之頗覺義高如雲其官銜曰臺灣民主國總統前署臺灣巡撫部院布政使司其印文曰臺灣民主國總統之印仍如巡撫印式署門立黃旗二大書民主國字樣改藩署曰內部專轄政務改籌防局曰海部專轄兵機餘仍舊貫

十二日署埔裏社廳溫司馬培華由北赴廳接篆過集集街時留飲暢談言及北垣官商民遷移紛紛各衙署亦幾空如洗時臺北府吏俞蔚臣太守鴻淡水縣吏凌英士大令均係月初始行接篆窺官場之意皆持走字訣耳云云而溫司馬談吐之間猶若接篆後將大有一番作爲者是則予不解也此時早奉

上諭飭文武分班內渡第唐帥壓擱不行故宦途皆未奉明文然不論其有無地旣割矣官必遷矣此不待言而明者捷足先行者固屬膽微識小貪戀不去者亦爲利令智

昏均之無當耳

十六日予復至府以交替局務也接辦者爲林景雲二尹覲光廣東人本爲集集街腦商不願離台故府尊委接此差也嗣聞於六月中因疾作古東望鯤島痛惻頗深惟時予仍寓王槐三丈處至府署及彰化縣丁調臣兄處刺探北事所云皆紛紛不一然驛路電線均不通矣而楊觀察林觀察均急調赴北應援乃行至新竹大甲擁兵不前以意度之知臺北必不守矣而南中各路則安謐如常且前數日署臺灣縣史博侯大令濟道署雲林縣羅潤甫大令尙由北來接篆署臺中府黎伯鄂太守景嵩亦擇於十七日接印當時閩城文武紳董皆依舊脚靴手版冠冕趨跲真可謂好整以暇者矣

二十日林觀察棟軍退回彰化楊觀察由大安海口遁知臺北失矣然而未審其詳嗣聞王桐封丈云日人初八日由基隆金包里登岸初九日湘軍接仗小勝廣勇繼進而敗後隊見敗卽譁羣相潰逃唐帥惟時在基隆督陣見勢不可爲於初十日返北部署行囊十二夜遂縱火焚撫署微服而逃各官皆隻身遁走時日人之登岸者實不過二

三百人耳唐帥既至滬尾登駕時輪以無潮不能出口爲李文魁所知亟至外砲臺聲言唐帥若行則開砲擊船唐帥急遣人賄之復倩德國保商兵輪洋人至砲臺去其機關使不能開放而觀音山砲臺聞知亦效其所爲船中爲之擊斃者六人唐帥復請德兵輪開砲擊毀其臺始克駛行是夜城內艫舸大稻埕均如絲之棼次日廣勇淮勇潰散至北殺人焚屋之事無處無之庫款尙餘二十餘萬皆被分劫土匪亦乘之而起四處蹂躪不堪惟各洋行高張國旗緊閉鐵扉無敢過問者於是艫舸大稻埕居人各聚義自守亂勇不得逞向新竹等路而去行至中途多爲土人截殺可爲大快人心惟土匪之亂愈甚士紳因詣基公請日人至北安民十六日日人至北土匪卽漸斂跡然鄉僻仍肆無忌憚故王桐丈於十八日行尙被其小劫也惟日人法律甚嚴有一著名土匪日兵拿獲縛之以木棉灌之以煤油燒化之而後已又有土匪二十餘人正在搶劫爲日兵三人瞥見直前擒獲均蜷縮不敢動亦可云奇矣日人至北者一總督樺山一台北府某一淡水縣某並兵士數十人而已至北後四處游行以察輿情時桐丈寄寓

大稻埕東蒼芳酒樓其總督等偕至樓中共飲臨行予以番佛一尊而去桐丈寓於左側室內壁中窺見者也嗟乎唐帥若當奉 旨後與日人約明不得傷我官民兵商訂日交割則上可不違君下可不損民而公論亦不得爲非苟其欲爲驚人奇業必當先具過人卓識將不濫選兵不濫招即使基滬不守亦可退至新竹設再不守則台中台南均可爲退步如實不能支則與台終始以身殉之庶幾一片忠耿之心尙可表白於萬世乃地已割而思據敵未至而兵潰始則布置無方繼則倉皇出走且尙有滿載交趾寶物而歸之說不得爲流芳不得爲遺臭雖有百喙亦難諱莫如深矣圖終演始後之欲建偉略者尙其以之爲鑒乎

二十一日府城門禁復嚴團練勇終日坐守嚴密稽察准入而不准出官商士賈街談巷語無一可聽者聞沿途又有搶刼之事離亂張皇氣象復如清和初旬景况予本擬是日由台南附輪內渡以無人夫而止

二十二日晨予偕胡管帶帶數勇乘輿行六十里過寶斗鎮至刺桐巷寶斗屬彰邑刺

桐屬雲邑寶鎮大鬧市也次日行四十里過他里霧至嘉義縣他里霧嘉屬也入城游行見闌闐依然如故而亦間有遷移者前縣鄧季垂大令嘉績已行接任者爲大武隴巡檢孫瀛生少尉嗣接祝子誠兄函云日兵至嘉少尉被擄作工扛埋屍首乃兄遇害亦經少尉收埋後被奸民因財設計指名加害竟被收禁迨後解至台南病幾至死幸日民政憐憫釋放始得身回內地此亦不見機之過也予復以 先十嬉靈櫬尙層蕭寺以時促不及扶運且劉軍門在臺南海口稽察出入甚爲嚴密亦不能出口因親往察視囑局中勇丁寓嘉者爲之照看現託子誠兄代爲浮葬矣次日復行六十里過下加冬至茅港尾下加冬嘉屬茅港尾安屬也旅邸中滿住澎湖敗勇時因陳繼生二尹建旗招募故舊集於此何均在夢夢中耶次日復行四十里過看西街至臺南郡假寓北勢街怡記洋行是時劉軍門從容坐鎮安平一帶營勢聯絡地雷遍布由安至旗海邊均用竹爲浮橋以通來往而炮臺則不甚經意蓋爲安口無險可憑以死台擊活船必難得力故惟精練陸師專防腹地每日或自率勇查防或派員梭巡晝夜絡繹不絕

惟軍法雖嚴而糧餉太缺因於口岸飭人查守凡有內渡者搜其行篋如有銀洋則留八還二以作軍食誓守赤嵌不讓日敵敵亦畏其先聲雖屢在口外游弋而終不敢施一砲進一步署安平縣忠若虛大令滿襄理防務亦頗盡心竭力故臺南安如磐石上海申新滬各日報所言五月以前戰守各說皆子虛也此後如何則不知矣至商情則遷移內地者固不少支持殘局者亦尙多是夜行主張君招飲並召妓侑酒主賓皆歡履驚險之地如安樂之窩可謂能鎮靜矣次日適黃埔載糖赴滬晨起偕行友蔡君同乘馬車至安平見劉軍門壁壘一新旌旗生色各洋行內皆有洋兵數十名駐守海口復泊英法兵輪數隻保護彼國官商午刻乘駁船出口登輪風浪平和絕無顛簸成刻鼓輪以去予向安平三揖而作別矣時乙未五月二十六日也同舟者有署臺南府朱調元太守和鈞嘉義縣鄧李垂大令子刻過澎湖以無月不能瞻眺次日行至溫州洋面遇大霧停輪一宵次日霧仍不解至二十九日酉刻始抵吳淞以潮退不能進口遙瞻歇浦欣慰良深閏五月朔舟駛入口仍以霧不敢直抵碼頭至下海浦換雇小舟至

憶臺雜記

下卷

怡和碼頭登岸入城時予眷暫寓滬城園家團聚共慶化險爲夷矣

八〇